

REVAREVA HEBERU TAUDIA EDIA

1 ¹Hhereva taidia taidia amo, idau dala idau dala ai, Dirava, ese idau nega ai peroveta taudia ududia amo seneda e hereva henidiava; ²a ini dina dokodia ai ia Natuna ena amo ita vada e hereva henida. Natuna bunai īgau iboudiai vada e henia, ia ahuna; iena amo danu tanobada idoinai vada e kara. ³Ia bunai Dirava hairaina diari-diarina bona anitarana ihahegeregērena; ia bunai īgau iboudiai e abi isimu, ena siahu herevadia amo; ia sibona ese eda kara dika e haīgoeva vaitani, bena Herea Mikamika idibana kahana ai vada e helai, guba ai.

Iesu ese aneru e hereadiamu

⁴Ia ese aneru vada e hereadia, vada e henia ladana ese idia ladadia e hereadiamu hegeregērena. ⁵Edena nega ai Dirava ese aneru ta e hereva henia, eto,

Oi na lau natugu;
Hari dina ai vada na abimu.

Eiava

Lau na ia tamana ai bainala;
Ia danu lau natugu ai bainela.

⁶Ma Natuna roboana tanobada ai e mailaia negana ai, ia eto,
Dirava ena aneru iboudiai ese ia bae toma henia diho.

⁷Aneru e gwauraidiamu, e tomu,
Ena aneru na lai ai e halaodiamu;
Ena hesiai taudia be lahi hururu-hururudia ai e halaodiamu.
⁸A Natuna e gwauraiamu, e tomu,
Dirava e, emu terono e mia hanaihanaimu;
Emu basileia auna na kara maoromaoro toana.

⁹ Kara maoromaoro vada o ura henia,
 Kara havara-havara vada o inai henia;
 Una dainai Dirava, emu Dirava, ese moale dehorona vada e
 horolaimu bada,
 Bamomu vada e horolaidia marāgi.

¹⁰ Ina danu,
 Lohiabada e, matamana negana ai tanobada badidia o kara,
 Guba danu oi imamu ese e kara;

¹¹ Idia na bae puki, a oi na o noho hanaihanaimu;
 Idia iboudiai bae mouka-mouka, dabua na heto;

¹² Hetaru dabuana na heto oi ese ba loku, vada bae idau;
 A oi na so idaumu, emu mauri lağanidia danu basie ore,

¹³ A edena nega ai ia ese aneru ta e hereva henia, eto,
 Idibagu kahana ai ba helai,
 Ela bona oi inaimu loğora
 Oi aemu ihadaidia ġaudia ai baina halaodia.

¹⁴ Ġau tamona, idia iboudiai na hesiai laumadia, ani? Mauri bae abia
 taudia isiaidia ilaohenidia totona e siaidiamu.

Iesu na ita kakada

2 ¹ Una dainai, ta kamonai herevadia nahuadie baita toho, nega ta
 baita huretani garina. ² Badina be aneru ese e gwaurai herevadia
 bema momokani, bona kara havara iboudiai bona gwau-edede iboudiai
 bema mai davadia korikoridia, ³ ita na ede baitama roho mauri toma,
 hahemauri unu-badana baitama dadaraia negana ai? Hahemauri bunai
 Lohiabada ese e gwauraia guna; bena iena amo e kamonai taudia ese
 vada e hamomokania ita eda. ⁴ Bona Dirava danu vada e hahedinaraia,
 toa ai, hoa karadia ai, siahu karadia idau-idau ai, bona Lauma Helaġa ena
 herahia ai, ena ura heġereġerena.

⁵ Badina be mauri gabena, ai ese a herevalaiamu, na dia aneru se
 henidia bae biagua. ⁶ Buka itorena tauna ta vada e hereva, eto,

Taunimanima be dahaka oi ese ia o laloamu?

Taunimanima natuna be daika oi ese ia o dosiamu?

⁷ Oi ese o karaia, aneru ese sisina mo ia e hereaiamu;

Hairai mai hemataurai ida oi ese kwarana o havavalalaia.

Oi imamu ai o kara ġaudia iboudiai vada o henia, baine biagudia;

⁸ Ġau iboudiai ia aena henunai vada o atodia, ia ese baine biagudia.

Badina be ġau idoidiae taunimanima henunai e atodia negana ai, ġau ta se
 rakatania idauhai. To harihari ta itaiamu, ġau idoidiae na dia ia henunai. ⁹ A
 nega sisina mo aneru ese e hereaia tauna, Iesu, harihari ta itaiamu, mase
 hisihisina dainai hairai mai hemataurai ida kwarana vada e havavalalaia; Dirava
 ena harihari-bada ai mase mamina e abia, taunimanima iboudiai daidiai.

¹⁰Ina na diaġau namona, ena, bona ena amo, ġau iboudiai e havaramu Diravana na, ia natuna loġora hairai ai bema hakaudia vareai totona ese, edia Hahemauri Tauna na hisihisi amo bema hahereiaia dae. ¹¹Badina be hahelaġa tauna bona e hahelaġadie taudia na iduhu tamona; una dainai ia na asi ena hemarai ia tadina baine gwauraidia. ¹²Eto,

Oi ladamu baina gwauraia, tadigu vairadai;

Hebou lalonai baina hanamomu egu ane ai.

¹³Ma eto,

Baina abidadama henia.

Ma eto,

Lau o ina,

Bona natugu, Dirava ese vada e henigu, bini.

¹⁴Benaini, natuna be mai hidiodia bona mai raradia dainai ia ese danu tau-anina e abia idia heġereġeredia; mase amo ia ese mase biaguna, una na diabolo, baine hadarerea, ¹⁵bona edia mauri dinadia iboudiai mase garina ese e ġuidiamu taudia baine ruhadia nege helaoreana.

¹⁶Momokani, ia na dia aneru se kahadia, a Abrahamgarana hari. ¹⁷Una dainai ia na ġau iboudiai lalodiai tadina ida e heġereġere, hahelaġa tauna badana ai bainela, mai ena hebogahisi bona mai ena kara maoromaoro Dirava ena ġaukara lalonai, taunimanima edia dika iabi-ohona. ¹⁸Ia na hedibaġani e mamiamu taudia idurudia mai dibana, badina be ia sibona ese hisihisi bona hedibaġani mamidia e abi dainai.

Iesu na hahelaġa tauna badana

3 ¹Taunabunai, varavaragu helaġamui e, umui danu Dirava ena boiboi ai e lalomui kau taumui, Iesu ba haeroa. Eda kamonai ai, ia na Dirava ese e siaia, eda hahelaġa tauna badana. ²E siaia Diravana na ia ese e kamonai henia, Mose ese Dirava ena bese lalonai e kamonai henia heġereġerena. ³A ia ese hairai badana vada e abia, Mose ese hairai maraġina e abia. Una danu namo; heġereġerena be ruma ikarana tauna e matauraia badamu, a e karaia rumana e matauraia maraġimu. ⁴Badina be ruma iboudiai na mai ikaradia taudia, a ġau iboudiai ikaradia be Dirava. ⁵Mose ese Dirava ena bese idoinai lalonai hesiae ġaukarana e karaia goevaġgoeva mai kamonaina ida, do bae gwaurai ġaudia ihahedinaraidia. ⁶A Keriso ese Dirava ena bese e biagua mai kamonaina ida, badina be ia na natuna dainai. Ita na iena bese, eda haheauka bona eda helaro moaledia ta badinamu dainai.

⁷Badina bunai Lauma Helaġa na e tomu,

Hari dina ai gadona boma kamonai,

⁸Lalomui basio ha-auka, Dirava o dadaraia negana ai na heto,

Hedibagani dinana ai tano ġaġaena ai na heto;

⁹Una negana ai senemui ese e tohoguva,

Bona laġani hari-ahui lalodai egu kara e itava.

¹⁰ Badina bunai, una uru na badu heniava,

Nato “Vaevae laJodia e kereremu,

Egu dala danu asi dibadia.”

¹¹ Bena egu badu ai na gwau hamata,

Nato “Egu laġa-ani ai basie raka vareai”.

¹² Varavaragu e, nahuamui ba toho, ta ese lalona baine hadaia kerere, asi ena kamonai, bena Mauri Diravana baine rakatania na garina. ¹³ A daba daba idoidiae ba hahealo heheni, doini “Hari dina” ta gwauraiamu negana ai, kara dika ena koikoi ese lalomui baine ha-auka na garina. ¹⁴ Badina be ita na Keriso bamona, una dainai eda heabidadama baita badinaia tarikatarika, matamana amo ela bona dokona. ¹⁵ Vada e hereva heġereġerena eto,

Hari dina ai gadona boma kamonai

Lalomui basio ha-auka, Dirava o dadaraia negana ai na heto.

¹⁶ Daidia gadona e kamonai, to ena badu e havaraia? Mose ese Aigupto amo e hakaudia lasi taudia iboudiai, ani? ¹⁷ Bona laġani hari-ahui e badu henidiava taudia be daidia? Kara dika taudia, tano ġaġaena ai e mase ore, ani. ¹⁸ Ma daidia ia ese e gwau henidia hamata, ena laġa-ani ai basie raka vareai eto? Cwau-edede taudia, ani? ¹⁹ Taunabunai vada tame diba, asi edia kamonai dainai asie raka vareai.

Eda laġani Keriso enai

4 ¹ Ena gwauhamata na doini mia, ena laġa-ani ai baita raka vareai eto; to eda gari na umui haida bae itamu o ġava tuna. ² Badina be sivarai namo vada e harorolai henida, idia heġereġeredia; to e kamonai herevadia ese asie hanamodia, badina be e kamonai taudia ese asie abidae. ³ Badina be ita kamonai tauda na ena laġa-ani ai ta raka vareaimu; ena hereva heġereġerena, eto,

Egu badu ai na gwau hamata,

Nato “Egu laġa-ani ai basie raka vareai”.

Ġau tamona, iena ġaukara be tanobada ikarana negana ai e kara ġuġuru.

⁴ Badina be buka ta ai dina ihahituna e herevalaia, eto, Dirava na dina ihahituna ai ena ġaukara iboudiai amo e laġa ani. ⁵ Ma ina gabu ai eto, Egu laġaani ai basie raka vareai.

⁶ Benaini, haida do bae raka vareai; to sivarai namo e harorolai henidia guna taudia na edia gwau-edede dainai asie raka vareai. ⁷ Una dainai ia ese dina ta ma e abia hidi, “Hari dina” e gwauraia; bena nega daudau vada e lao bubuni David ese ena hereva ma e gwauraia loumu, e tomu,

Hari dina ai gadona boma kamonai,

Lalomui na basio ha-auka.

⁸ Badina be Iosua ese laġa-ani bema henidia, Dirava ese nega daudau murinai dina ta ma basinema herevalaia. ⁹ Taunabunai, dina helāġa ena

laḡa-ani na doini mia, Dirava ena orea taudia edia. ¹⁰Badina be ena laḡa-ani ai e raka vareaimu tauna ese ena ġaukara amo e laḡa animu, Dirava ese iena ġaukara amo e laga aniva na helo. ¹¹Una dainai, una laḡa-ani ai baita raka vareai toho mai goadada ida, tau ta ese gwau-deede taudia baine haġoidia bena baine keto na garina.

¹²Badina na Dirava ena hereva na e maurimu, bona mai siahuna; ia ganona ese isena rua mai ganodia darena e hereaiamu. E hegwadamu ela bona dara bona Iauma e hapararadiamu, bona garugaru bona turia haradia danu e hapararadiamu. Eda lalo-hadai bona eda ura ia na dibana herea. ¹³Mauri ġauna ta ia vairana amo basine hehuni diba; ġau iboudiai na ia, e hahemaoro henidamu Diravana, vairanai hehedinararai.

Keriso, eda hahelaġa tauna badana

¹⁴Ita na mai eda hahelaġa tauna badana, guba ai vada e raka hanai; ia na Iesu, Dirava Natuna. Taunabunai, ia iabi-daena baita kahua tao.

¹⁵Badina be eda hahelaġa tauna badana na dia eda manoka-manoka mamina iabina asi dibana tauna. Ġau iboudiai ese ia e dibaġaniava, ita e dibaġanidamu heġeregerena; to ia na asi ena kara dika. ¹⁶Benaini, hebogahisi teronona baita raka henia kahi, asi eda gari; bena baine bogoda hisi, bona harihari-bada, eda dabu negadia ai baine kahada hariharina, baita abia.

Keriso na taunimanima iboudiai edia hahelaġa tauna

5 ¹Hahelaġa taudia badadia iboudiai na taunimanima bogaragidia amo e abidia hidimu, taunimanima daidai Dirava bae boua, herahia ġaudia bona boubou ġaudia bae hahelaġa, dika iabi-ohodia. ²Hahelaġa tauna badana ese lalo-duhu taudia bona kerere taudia e bogadia hisimu, badina be ia danu manoka-manoka ese e butua taomu; ³una dainai, ia ese boubou ġaudia baine hahelaġa, dia taunimanima mo edia kerere daidai, a ia sib-onā ena kerere daidai danu. ⁴Bona tau ta ese ina dagi namona sibona se abiamu; a Dirava ese e boiriamu, Aaron e boiria heġeregerena. ⁵Unuhetomana danu, Keriso na sibona se heimodai, hahelaġa tauna badana dagina se abia, to dagi e henia Diravana eto,

Oi na lau Natugu;

Hari dina ai vada na havaramu.

⁶Ia danu ma e hereva, eto,

Oi na hahelaġa tauna, o noho hanaihanaimu;

Melkisedek ena orea taumu.

⁷Ia tanobada ai e nohova dinadia ai, Iesu ese mase amo baine hamauria diba Diravana na e ġuriava bona e noiava, mai taina bona mai irurumatana ida; bena Dirava garina e gariva dainai ena noinoi ġauna e abia. ⁸Ena be ia na Dirava Natuna to hisihisi ese Dirava ikamonai-henina

e hadibaiava, ⁹ela bona e namo ġuġuru; bena ia ikamonai-henina taudia iboudiai edia mauri hanaihanai ihavarana tauna ai ela. ¹⁰Badina be Dirava ese e gwauraia, hahelaġa tauna badana, Melkisedek ena oreia ai.

¹¹Emai hereva momo mimia, ia herevana; ġau tamona anidia igwauraidia na metau, badina be umui taiamui vada e kudima. ¹²Nega vada eme gini dae, umui na hahediba taumui ai boma lao, to doini o dabumu; ta ese Dirava ena hereva badidia bema hadibalaimui lou bema namo. Umui na doini rata inu memerodia na heheto; aniani korikori ianidia na asi goadamui. ¹³Rata inu merona na kara maoromaoro herevana asi dibana, badina be ia na karukaru. ¹⁴A aniani korikori be taudia vada e lo taudia adia; idia na lalodia vada eme manada, namo bona dika toadia na mai dibadia.

Dirava ena harihari-bada

6 ¹Badina bunai, Keriso ena hereva badidia baita rakatani, huahuadia baita ġava. Badidia bini basita hagini loulou: kara asi anidia ihelalolai-kerehaidia; Dirava ibadinana; ²bapatiso herevadia; ima tubua ai ato kau herevadia; mase ihatore-isidia herevadia; mia hanaihanai hahemaocona herevadia. ³Dirava baine ura, ini na bae mia.

⁴Gunaguna lalodia e diariva, bona guba hariharina e mamia tohova, bona Lauma Helaġa enai ahudia e abiva, ⁵bona Dirava ena hereva namona bona mauri gabena siahuna e mami tohova, ⁶taudia na bema keto, idia na basiema helalo kerehai lou diba; badina be idia sibodia ese Dirava Natuna vada e hasatauroa lou bona taunimanima vairadai vada e hahemaraia. ⁷Badina be e diho louloumu medudia e inumu, bona aniani ġaudia namodia e havaramu uma taudia edia, tanona ese Dirava ena hahenamo e abiamu. ⁸A au ginigini bona ava ġiniġini e havaramu tanona ese hedadarai bona heuduguirai e abimu; dokona ai lahi ese baine ara ore.

⁹A lalokau e, ena be ini a hereva tomamu, to lalomai e tomamu hahemauri badina ġaudia namodia na lalomui ai vada mimia. ¹⁰Badina be Dirava na asi ena kara gageva-gageva; emui ġaukara bona emui lalokau ia ladana dainai vada o hahedinarai, helaġa taudia o durudiava bona o durudiamu, ia ese basine lato boio. ¹¹A ai na a ura badamu umui iboumui ai ene ba goada toma, ela bona dokona ai emui helaro ba hagugurua. ¹²Basio hesiku; a edia abidadama bona edia habeauka daidiai ahudia vada e abi taudia do ba haġoidia.

¹³Badina be Dirava ese Abraham e gwau hamata henia negana ai, ta ese ia se hereiai dainai ia sibona ladana ai e gwau hamata, ¹⁴eto, Momokani baina hanamomu, garamu danu baina hahutumadia. ¹⁵Bena Abraham e haheauka taritariva ela bona gwauhamata anina e davaria. ¹⁶Badina be taunimanima ese herea tauna ladana ai e gwau hamatamu;

bena hereva ihamomokanilaina gwauhamatana ese edia hepapahuahu idoinai e hadokoamu. ¹⁷Unuhetomana, Dirava na e urava gwauhamata dihina taudia bae diba ġoevāgoeva iena Ialo-hadai basine idau; una negana ai ia ese hereva helaġana amo e gwau hamata henidia. ¹⁸Unu ġau ruaosi na basie idau, bonaunu ġau ruaosi ai danu Dirava ese basine koida diba. Taunabunai ita na hahedika vada ta heautania, bona goada vada davaria, ita ese vairadai enle hure helarona baita kahua tao. ¹⁹Una helaro na laumada dogona na heto, se idaumu bona se mareremu, seseahu unukahanai e vareaimu; ²⁰unuseni ai e gunalaida tauna, Iesu, vada e raka vareai guna ita daidai, hahelaġa tauna badana Melkisedek ena orea ai vada e hahelao, ela bona hanaihanai.

Melkisedek pavapava bona hahelaġa tauna

7 ¹Hari Melkisedek na Salem pavapavana bona Herea Mikamika Diravana ena hahelaġa tauna. Ia na Abraham ida e hedavari, Abraham ese hanua pavapavadia iala-masedia amo e lou negana ai, bena e hanamo. ²Abraham ese danu kohu e karoa, karoa gwauta, bena karoa ta ia e henia. Ia ladana gunana anina be Kara Maoromaoro Lohiana. Ma ladana ta Salema Pavapavana, anina be Maino Lohiana. ³Ia na asi tamana, asi sinana, asi iduhuna, asi ena vara dinana, asi ena mauri dokona; a Dirava Natuna ihaġoina ai vada e halaoa, hahelaġa tauna, e noho hanaihanaimu.

⁴Una tau ba haeroa, ede e herea tomava. Seneda Abraham ese tuari ai e abi kohudia e karoadia, karoa ihagwautana e henia. ⁵Momokani, Levi natuna haida ese danu hahelaġa dagina e abia, bena mai siahudia ida taunimanima edia kohu e karoadia, karoa ihagwautadia bae abi, taravatu heġereġerena. Ena be varavaradia, Abraham besena taudia, to e abi. ⁶A ia, ena be dia idia edia iduhuna tauna, to Abraham ena kohu karoana ihagwautana e abia, bona Dirava ese e gwau hamata henia tauna na ia ese e hahenamo henia. ⁷A dibada vaitani, dagi maraġina tauna na dagi badana tauna ese e hahenamo heniamu. ⁸Harihari, bae mase taudia ese kohu e karoadiam, karoa ihagwautadia e abimu; a una negana ai, sivaraina e piuamu doini e maurimu e tomamu tauna ese e abiva. ⁹Bona e kara Levi, karoa ihagwautadia iabidia tauna, ese danu ena kohu karoana ihagwautana e henia na heto, Abraham dainai; ¹⁰badina be ia na tamana tau-anina ai, Melkisedek na tamana ida e hedavari negana ai.

¹¹Eda bese taudia ese Levi iduhuna hahelaġa taudia edia amo taravatu e abia; ġau tamona hahenamo ġoeva-daena na idia edia amo bema vara, hahelaġa tauna idauna ta, dia Aaron ena iduhuna tauna a Melkisedek ena orea tauna, bema gini anina be dahaka? ¹²Badina be hahelaġa taudia bae idau, taravatu danu baine idau. ¹³Badina be ini e herevalaia tomamu tauna na ena iduhuna na idau; bona iena iduhuna tauna ta ese pata helāġana

gaukaradia do se kara. ¹⁴Badina be tame diba eda Lohiabada be Iuda iduhuna amo e vara, a Mose ese hahelağā taudia haida una iduhu ai se gwauraidia. ¹⁵Ina na tame diba ġoevaġoева, badina be hahelağā tauna idauna ta vada e vara, Melkisedek iħaġoina; ¹⁶ena dagi danu vada e henia, dia tau-anina taravatuna ibadinana totona, a mauri hanaihanai siahuna ai. ¹⁷Badina be ini e gwauraia tomamu:

Oi na hahelağā tauna, o noho hanaihanaimu,
Melkisedek ena orea taumu.

¹⁸Benaini, taravatu gunana vada eme heabi oho, badina be ia na manokamanoka bona asi anina, ¹⁹bona ġau ta se haġugurua. A helaro matamatana bona namo-hereana ese ia gabuna vada eme abia: unu amo Dirava ta raka henia kahimu. ²⁰Bona ina na mai gwauhamata helağana. ²¹Idia na hahelağā taudia ai e halaodiava na asi edia gwauhamata, a ia na mai gwauhamatana ida hahelağā tauna ai e halaoa. E gwau hamata Diravana ese e hereva henia, eto,

Lohiabada na vada e gwau hamata vaitani,
Lalona danu basine ha-idaua;
E tomu “Oi na hahelağā tauna,
O noho hanaihanaimu”.

²²Taunabunai, Iesu na herohemaino matamatana ihamomokanina.

²³Ina danu: unu hahelağā taudia na hutuma, badina be mase ese e butudia taova, edia dagi ai basie noho hanaihanai; ²⁴a ina hahelağā tauna na e noho hanaihanaimu, asi ibolona. ²⁵Badina bunai ia na mai goadana, ia bagunai Diravana e raka henia kahimu taudia baine hamauridia ġuġuru, badina be e noho hanaihanaimu, bona ita daidai e noinoi hanaihanaimu.

²⁶Hahelağā tauna badana unuhetomana vada e namo ita eda: helağā tauna, asi ena dika, asi bebeka-bebekana, asi ahuna kara dika taudia ediai, guba doriva-dorivana ai vada e dae. ²⁷Ia na dia unu hahelağā taudia badadia na heheto: idia ese daba iboudiai boubou ġaudia e hahelağadiava, guna idia sibodia edia dika irohodia, gabe amo hanua taudia edia dika irohodia. A ia ese nega tamona boubou ġauna e hahelağāia vaitani, ia sibona boubou ġauna ai e hahelao negana ai.

²⁸Badina be taravatu ese manoka-manoka taudia na hahelağā taudia ai e halaodiava; a gwauhamata herevana, taravatu e gabelaia ġauna, ese Natuna na hahelağā tauna badana ai vada e halaoa. Ia eme ġoeva dae ela bona hanaihanai.

Taravatu matamatana

8 ¹Ai ese vada ame gwaurai herevadia anidia bini: ita na mai eda hahelağā tauna badana, Herea Mikamika Diravana ena terono idibana kahana ai vada e helaimu, guba ai. ²Ia na helağā ġaudia bona

ḡuriğuri kalagana korikori ireğudia tauna: una kalaga na taunimanima ese asie taruhaia, a Lohiabada ese e taruhaia.

³Hahelağā taudia badadia iboudiai vada e duanaidia, herahia ġaudia bona boubou ġaudia bae boudia; taunabunai, ina hahelağā tauna badana danu mai ena herahia ġauna. ⁴Tanobada ai bema noho, ia na hahelağā tauna ai basinema lao; badina be hahelağā taudia haida nonoho, idia ese boubou ġaudia e hahelağamu, taravatu heğereğeren. ⁵Idia edia ġaukara na guba ai e karamu ġaukarana ihaheğereğeren bona laulauna mo. Dirava ese Mose e tamanua na heto, ḡuriğuri kalagana baine karia negana ai; eto, Nahuamu ba tohoa, ḡau iboudiai ba kara, ororo ai na haheitalaimu ġaudia oromadia heğereğedia. ⁶A harihari Keriso ese hereğü dagina hereana vada e abia, dagi gunadia e hereadiamu; ina na iena herohemaino ese taravatu gunana e hereaiamu heğereğeren, badina be gwauhamata hereadia latadiai e hadaia dainai.

⁷Badina be taravatu gunana bema asi kererena, iharuana bema asi badina. ⁸A Dirava ese kereredia e gwaurai, eto,

Lohiabada na e gwaumu, dina vada be maimu,
Taravatu matamatana do baina karaia, Israel besena ida
Bona Iuda besena ida;

⁹Dia senedia ida na karaia taravatuna heğereğeren,
Imadia na abi dinana ai,
Aigupto tanona amo baina hakaudia lasi nato;
Badina be egu taravatu asie badinaiaava,
Taunabunai na dadaraidiava;
Lohiabada na unu e gwau tomamu.

¹⁰Lohiabada ma e gwaumu: unu dina muridiae,
Ina tarava baina atua, Israel besena ida;
Egu haheğani na lalodia ai baina ato,
Kudoudia ai baina tore;
Edia Dirava ai bainala,
Idia danu besegu ai baela.

¹¹Basie hahediba heheni danu, basieto
“Lohiabada ba dibaia”,
Badina be kikina-badana iboudiai ese lau bae dibagu.
¹²Badina be edia kara dikadia lalodiai baina bogadia hisi,
Bona edia kara havara basina lalo tao.

¹³Taravatu matamatana iherevalaina ai, ia ese gunana na vada e ore ġauna ai e halaoa. Bona siahuna e ore ġauna, ḡau gunana, vada be pukimu.

Ḡuriğuri Kalagana

9 ¹Taravatu gunana na mai ena toma-dihō haheğanidia bona mai ena dubu tanobada ai. ²Badina be ḡuriğuri kalagana e karaia, murimuri

daiutuna ai be lamepa iato-kauna ġau bona pata bona Dirava vairanai e atoa flaoana; una na gabu helaġana e gwauraia. ³Seseahu iharuana lalonai be Helaġa Herea daiutuna ta e gwauraia hidi. ⁴Ia lalonai pata helaġana ta gold ai e karaia, muramura mai bonana patana bunai; bona taravatu mauana ta danu gold ai e havavaia heġeġe; bona maua lalonai be gold kibona auta, anina be mana; bona Aaron ena itotohi, e gara kau ġauna; bona taravatu nadidia danu una maua lalonai. ⁵Maua daenai hairai kerubidia ese hebogahisi teronona e hakerukeruava. To unu ġau harihari basia herevalai hagau-hagau diba.

⁶Unu ġau be unu e seu toma; bena hahelaġa taudia na murimuri daiutuna lalonai e raka vareai loulou, boubou ġaudia e hahelaġadu. ⁷A laloma daiutuna be hahelaġa tauna badana mo sibona laġani ta lalonai nega tamona e raka vareai, rara e vareailaia, e hahelaġaia, ia sibona dainai, bona bese taudia edia kara kerere-kerere daidiai. ⁸Ini amo Lauma Helaġa ese e hadibadiamu: Helaġa Herea gabuna iraka-vareaina dalana do se hekeho, murimuri daiutuna dounu gini negana ai. ⁹Una na hereva heġereġerena, ina nega ena. Herahia ġaudia bona boubou ġaudia vada e hahelagamu, ġau tamona idia na asi siahudia toma-diho tauna lalona iħaġoevana. ¹⁰Badina be edia siahu badidia be ini mo; aniani gaudia, inuinu ġaudia, digu karadia haida, tau-anina taravatudia; e hagini, taunimanima ese bae badina ela bona hahematamata negana.

¹¹A Keriso ema, vada e vara ġaudia namodia edia hahelaġa tauna badana. Bena ġuriġuri kalagana bada-hereana bona namo-hereana amo e raka hanai, dia taunimamima imadia e karaia ġauna bona dia ina tanobada gauna. ¹²E raka hanai, Helaġa Herea gabuna ai e raka vareai vaitani, nega tamona mo; dia nani bona boromakau natudia raradia a ia sibona rarana e vareailaia, hahemauri hanaihanai e havaraia. ¹³Badina be nani raradia bona boromakau maruanedia raradia bona boromakau natudia lahi ese e ġole oħo kahudia amo na diktaudia bema ġigidja tao, bona tau-anidja bema ġoevaġoева; ¹⁴o Keriso rarana, Noho-hanaihanai Laumana dainai sibona Dirava e henia tauna rarana, asi bebekabebekana tauna rarana, siahuna basinema herea a, umui lalomui mase karadia amo bema haġoева, bona Mauri Diravana ena hesiai taudia ai bema halaomui ani?

¹⁵Taunabunai, ia na taravatu matamatana ena herohemaino tauna; taravatu gunana vada e tataia utu taudia na mase ta ai e hamauridiamu, bona e boiridja taudia na mia-hanaihanai ahudia e henidiamu, ena gwauhamata heġereġerena. ¹⁶Badina be tau ta dihina ese ahudia basie abi ela bona una tau baine mase momokani; ¹⁷ena kohu iħaridja herevadja na mai siahudia ena mase dainai, a ena mauri negana ai idia na asi siahudia. ¹⁸Unuhetomana, taravatu gunana danu rara ese e hamomokania. ¹⁹Badina be Mose ese taravatu ena haheġani iboudiai

na bese taudia iboudiai e herevalai henidiava; bena boromakau natudia raradia bona nani raradia bona ranu e abi, mamoe huina kakakakana bona husopo danu e abi, bena buka bona bese taudia iboudiai e nevarilaidia,²⁰ eto “Ina na Dirava ese vada e hağanilaimui taravatuna rarana”.²¹ Unuhetomana danu ia ese ġuriġuri kalagana bona helāġa ġaudia iboudiai rara ai e nevaridia.²² Oibe; taravatu henuna ġaudia momo herea rara ese e haġoevadiamu; bona rara basinema hebulu, dika igwau-taodia bema lasi.

²³ Benaini, guba ġaudia ihaheġereġeredia ġaudia na ini helāġa karadia amo e haġoeva, a guba ġaudia korikori na boubou namodia amo bae haġoeva.²⁴ Badina be Keriso vada e raka vareai dubuna na dia taunimanima imadia amo e karaia ġauna dubu korikorina ihaheġereġerena, a guba ai vada e raka vareai, Dirava vairanai e hedinaraimu ita daidai.²⁵ Bona ia na se raka vareai sibona boubou ġauna ai bainela loulou, hahelaġa tauna badana na heto, ia ese laġani ta ta amo Helaġa Herea gabuna lalonai e raka vareai, rara e vareailaia, to dia ia rarana.²⁶ Unu bema heto, Keriso na nega diaġau bema hisihisi, tanobada matamana ema bona harihari. A ia be nega tamona, ina nega dokona ai, vada eme hedinarai, sibona boubou ġauna ai vada ela, dika iabiohona.²⁷ Taunimanima edia mase na tamona, murinai hahemaoro bae abia;²⁸ unuhetomana Keriso danu nega tamona boubou ġauna ai vada e halaoa, hutuma edia kara dika ihuadia. Ma baine hedinarai lou, dia kara dika ihamaoromaorona totona, a mai helarodia ida e nariamu taudia ihamauridia.

Dala matamatana

10 ¹Taravatu na ġau namodia bae vara laulaudia mo, dia ġau korikoridia. Idia ese hari boubou ġaudia laġani laġani e hahelaġamu. To taravatu na asi goadana ia ese e raka kahi maimu taudia baine hanamodia ġuguru. ²Bema mai goadana, boubou ġaudia ihahelaġadia na bema doko, ani? Badina be toma-dihō taudia bema ġoева vaitani, idia na kara dika basiema lalo lou. ³A unu boubou lalodiae idia ese laġani ta ta amo edia kara dika e helalolai loulou. ⁴Badina be boromakau mamaruanedia raradia bona nani raradia ese kara dika basie abi oho diba.

⁵Taunabunai, Keriso na tanobada ema, eto,
Helaġa karadia bona boubou ġaudia so uramu,
A tau-anina ta vada o abia heġaeġae lauegu;

⁶Lahi ese e gole oho ġaudia bona kara dika iabi-ohodia ġaudia so moalelaimu.

⁷Bena nato “Lau o ina,
Taravatu bukana ai e torelaigu heġereġerena

Dirava e, emu ura ikarana totona nama”.

⁸ Ena hereva gini-gunana eto, Helaǵa karadia bona boubou ǵaudia bona lahi ese e ǵole oho ǵaudia bona kara dika iabi-ohodia ǵaudia so uramu bona so moalelaimu. Ğau tamona idia ese taravatu heǵereǵerena ai vada e hahelaǵamu. ⁹ Ma eto, Lau o ina, emu ura ikarana nama. Gini-gunana e abia ohomu, iharuana baine haginia helaoreana. ¹⁰ Una ura ese vada e hahelaǵada, Iesu Keriso tau-anina nega tamona mo boubou ǵauna ai vada e halaoa dainai.

¹¹ Hahelaǵa taudia iboudiai dina ta ta amo e ginimu, helaǵa karadia e karamu, boubou ǵaudia tamodia e hahelaǵa louloumu. Ğau tamona, unu helaǵa ǵaudia ese kara dika basie abi oho diba. ¹² A Keriso ese boubou ǵauna tamona vada e hahelaǵaia, kara dika iabi-ohodia; bena Dirava idibana kahana ai vada e helai diho. ¹³ Una negana ema vada e henarimu, ela bona ia inaina na aena ihadaidia ǵaudia ai baine halaodia. ¹⁴ Badina be boubou ǵauna tamona amo ia ese e hahelaǵadiamu taudia na vada e haǵoevadia ǵuǵuru ela hanaihanai. ¹⁵ Lauma Helaǵa danu vada e hadibalaida; badina be ia eto,

¹⁶ Lohiabada na e gwaumu: Unu dina muridiae,
Ina tarava idia ida baina atua;
Egu haheǵani na kudoudia ai baina ato,
Lalodia ai baina tore.

¹⁷ Ma eto,

Edia kara dika bona edia kara havara basina lalo tao.

¹⁸ A unu kara bae gwaudia tao, kara dika iabi-ohodia ǵaudia bae hahelaǵa na asi badina.

¹⁹ Taunabunai, varavaragu e, asi eda daradara Helaǵa Herea gabuna lalonai baita raka vareai, Iesu rarana dainai. ²⁰ Ia ese dala matamatana, mauri dalana, vada e kehoa ita eda; seseahu e hanaiamu, ia tau-anina bunai. ²¹ Ita na mai eda hahelaǵa tauna badana, Dirava ena ruma itataona. ²² Taunabunai, baita raka kahira mai laloda momokanidia ida bona mai kamonai lava-daena ida. Laloda na vada eme nevari; lalo-hadai dikadia vada eme heabi oho, tau-anida danu ranu negari-negari ai vada eme hehuri ǵoevaǵoева. ²³ Eda helaro herevadia baita kahu tarika-tarika, basita raivaraiwa, badina be e gwaurai hamata tauna ena gwauhamata na momokani. ²⁴ Baita helalolai heheni, bena baita hahealo heheni, Ialokau bona kara namodia baita havara. ²⁵ Eda hegogo karadia danu basita nege, haida ese e nege heǵereǵerena, a baita hahealo heheni; oibe, ina kara baita habadaia, badina be, o itaiamu, dina badana eme kahikahi.

²⁶ Badina be hereva momokani vada ta diba vaitani murinai ma baita kara havara, boubou ǵauna ta dia mia eda kara dika iabi-ohodia; ²⁷ a hahemaoro inarina mo mia, mai gari-badana ida, bona lahi danu mia, Dirava inaina baine aradia ore. ²⁸ Tau ta ese Mose ena taravatu

e tataia utumu, bena dibadia taudia rarua eiava tatoi ese e gwauraia hedinaraimu, una tau na baine mase, basie bogaia hisi. ²⁹Ede o laloa tomamu? Dirava Natuna vada e moia tao; bona herohemaino rarana, e hahelaāga īauna, na asi ena helaāga īauna ai vada e halaoa; bona Harihari-bada Laumana vada e taoa tari tauna, na davana ede baine bada toma? ³⁰Badina be ita dibada daika eto “Dava ikarana be lau; lau ese dava baina henii”. Ma eto “Lohiabada ese ena bese taudia baine hahemaoro henidia”. ³¹Mauri Diravana imana ese baine butuda tao na mai garina.

³²Nega gunadia ba helalolai: Ialomui e diariva murinai hisihisi momo ese e butumui taova, a o haheukava. ³³Nega haida e lodu henimui bona e dağedäge henimui; ma nega haida unu e karadia toma taudia na o bamodia. ³⁴Badina be e īguidia taudia o bogadia hisi, bona emui kohu e dadi negadia ai edia kara o abi dae mai moalemui ida; badina be dibamui emui kohu namo-hereana na mia hanaihanai. ³⁵Taunabunai, emui boga auka basio negea; ia davana baine bada. ³⁶Badina be emui haheauka badina binai: Dirava ena ura ba karaia īgūguru, bena gwauhamata anina do bavabia.

³⁷Badina be asi vanahana

Bainema tauna do bainema, basine halahe;

³⁸A kara maoromaoro tauna na ena kamonai dainai do baine mauri;
To baine raka kerehai tauna na laumagu ese basine moalelai.

³⁹A ita na dia raka-kerehai tauda, dia boio tauda; ita na kamonai tauda, laumada na do bae mauri.

Abidadama taudia

11 ¹Abidadama na ta laromu īgaudia ihamomokanidia; bona abidadama dainai, asita daradaramu asita itadia īgaudia ediai. ²Badina be edia abidadama daulai Dirava ese sene taudia e hanamodiava. ³Abidadama dainai ita dibada Dirava ena hereva ese tanobada e karaia, bena ta itamu īgaudia be asita itamu īgaudia amo vada e vara.

⁴Abidadama dainai, Abel ese boubou īgauna namona e hahelaāgaia, Kain ena e hereaia; bena Dirava ese ena herahia īgauna e abia dae bona kara maoromaoro tauna e gwauraia. E mase, to ena abidadama dainai ia na doini e herevamu. ⁵Abidadama dainai, Enok na tanobada amo e heabi oho, mase asi dibana; asie davaria, badina be Dirava ese e abia oho. A do se heabi oho negana ai vada e gwauraia, Dirava ihamoalena tauna.

⁶A asi ena abidadama tauna na Dirava ihamoalena asi dibana. Badina be Dirava iraka-heni-kahina e uramu tauna ese baine abia dae guna Dirava na e maurimu, bona ia e tahuamu taudia davadia namodia baine henidia.

⁷Abidadama dainai Noa ese do se ita īgaudia Dirava ese e sisibalai henia

guna, bena Noa ese Dirava e kamonai henia, lagatoi auta e karaia. ena rumta taudia ihamauridia helaoreana. Unu amo ia ese tanobada e hahemaoro henia, bona abidadama amo e varamu kara maoromaorona na ia ahuna korikori ai e halaoa.

⁸Abidadama dainai, Abraham ese boiboi e hakala henia, e boiria ena hanua baine rakatania, gabu ta bainela, baine abia ia ahuna, negana ai. Bena e raka lasi; ede bainela na asi dibana. ⁹Abidadama dainai gwauhamata tanona ai e noho hedoa-hedoava, Isaak bona Iakob ida kalaga ai e nohova; idia raruosi danu ia ida gwauhamata dihina taudia. ¹⁰Badina be baine gini tutuka-tutuka hanuana na ia ese e tahuava: iseuna bona ikarana na Dirava. ¹¹Abidadama dainai Sara, ena be hane badana, to goada e davaria baine rogorogo; badina be e gwau henia hamata Diravana na ia ese e abidadama henia. ¹²Taunabunai tau ta, mase tauna na heto, ena amo bese badana vada e vara; una bese taudia na guba hisiudia heğereğeredia eiava kone rariana na heto, diağau duahi-duahi.

¹³Idia iboudiai abidadama ai e mase; gwauhamata anina asie abia, a dauha amo e itaia bona e abia dae; sibodia danu e hegwaurai, idia na idau taudia bona noho-hedoahedo taudia ina tanobada ai. ¹⁴Unu e hereva tomamu taudia na edia hereva anina eme hedinarai: idia ese edia tano korikori e tahuamu. ¹⁵Badina be e rakatania tanona bema laloa, reana edia lou dalana bema davaria. ¹⁶To idia ese tano namo-hereana ehekisehekise heniamu; ia na guba ai. Taunabunai, Dirava na se hemaraimu edia Dirava bae gwauraia; badina be hanua ta ia ese vada e abia heğaeğe idia edia.

¹⁷Abidadama dainai, hedibağani negana ai, Abraham ese Isaak e abia, boubou ġauna ai e halaoa. Oibe, hari gwauhamata e abia daeva tauna ese natuna vara-eddeana na boubou ġauna ai baine halaoa eto. ¹⁸Merona bunai vada e herevalaia, eto, Isaak ena amo oi garamu do bae vara. ¹⁹Badina be ia na e haeroa, Dirava na mai siahuna mase amo baine hatorea isi eto. Bena e abia lou, mase amo bema abia lou na heto. ²⁰Abidadama dainai Isaak ese Iakob bona Esau e hanamodia, gabeai bae vara ġaudia e gwaurai. ²¹Abidadama dainai, Iakob ena mase vada e kahira-kahira, bena ia ese Iosef natuna raruosi e hanamodia; e loma diho danu, ena itotohi kwarana ai e goru kau. ²²Abidadama dainai Iosef danu, ena mauri dokona ai, Israel besena edia raka lasi e gwauraia guna, bona ia turiana e hahedualai.

²³Abidadama dainai, Mose e vara negana ai na tamana sinana ese hua toi e huniava, badina be e itaiava ia na raho-namo merona; hanua pavapavana ena haheğani danu garina asie gariva. ²⁴Abidadama dainai Mose, tauna e lo ai, Farao natuna hahinenet dihina bae gwauraia na e dadaraia; ²⁵ia na Dirava ena bese taudia ida bae dikabou e ura bada, kara dikamaledia, asie mia daudau ġaudia, e ura maraġi. ²⁶Ia na e haeroa, Keriso dainai bae

lodu henia na ġau badana, Aigupto taudia edia taġa e hereaia eto; badina be davana mo e hāgerea. ²⁷Abidadama dainai, ia ese Aigupto e rakatania, hanua pavapavana ena badu garina se gariva; badina be ia na e haheauka, asita itaianmu Diravana vada e itaia na heto. ²⁸Abidadama dainai ia ese Lagau Hanai karana e badinaia, rara danu e nevari, ala-ala aneruna ese memero roboadie basine aladia mase helaoreana.

²⁹Abidadama dainai, eda bese taudia ese Davara Kakakakana e rakaia hanai, tano kaukauna ai bema raka na heto; a Aigupto taudia na unu bae kara toma eto negana ai e dono mamase. ³⁰Abidadama dainai, Ieriko maġuna na dina hitu e rakaia heġeġe, bena e keto. ³¹Abidadama dainai, Rahaba, mata-bodaga hahinena, na gwau-edede taudia ida se mase, hasinadoa taudia maino ai e abidia dae dainai.

³²Ma dahaka aina gwauraia? Badina be asi egu nega Gideon bona Barak bona Samson bona Iefeta bona David bona Samuel bona peroveta taudia baina herevalaidia. ³³Idia ese abidadama dainai tanobada basileiadie e hadarerediava; kara maoromaoro e karava; gwauhamata e abiva; leona ududia e kouva; ³⁴Iahi siahuna e habodoava; dare matana amo e roho mauriva; manoka-manoka e negeava, goada e abiava; tuari ai e kwalimuva, inai taudia edia tuari oreadia e hahavadia. ³⁵Hahine ese danu edia mase taudia e davaridie lou, e tore isi lou dainai. Haida na e dadabadia maseva; a mauri e dadaraia, tore-isi-lou namo-hereana bae abia helaoreana. ³⁶Ma haida e ġonaġonalaidiava, e kwadidiava, e ġuidiava, dibura rumadia ai e koudiava. ³⁷Nadi ai e hododia maseva, e iridia utuva, dare ai e aladia maseva. Mamoe kopidie bona nani kopidie e riorva, e loava; e ogoġamiva; e hisihisiva; taunimanima ese e hadikadiava. ³⁸Tanobada na asi ena namo, idia na latanai bae noho. Tano ġaġaedia ai bona ororo ai e loava; kohua ai bona guri ai e nohova.

³⁹Ini iboudiai, ena be edia abidadama ese vada e hamomokanidia, to gwauhamata anidia asie abiva; ⁴⁰badina be Dirava ese ġau namo-hereana vada e sua, idia sibodia ese basie abia, a idia ita ida ese baita abia hebou, baine hanamoda ġuġuru.

Ba haheauka

12 ¹Taunabunai, herarai taudia hutuma bada ese e ġeġeda ahumu dainai, e hametaudamu ġaudia idoidiae bona e kahuda taomu karadia dikadia baita ato tabe, bena heau-helulu vairadai e hure na baita heau mai haheukada ida. ²Iesu baita raraia tao; ia ese eda abidadama e havaraiamu bona e haġuġuruamu; ia danu vairanai e hure moalena dainai satauro e haheukalaia, hemaraina se laloa, bena Dirava ena terono idibana kahana ai vada e helaimu.

³Kara dika taudia ese e inai henia, a ia ese e haheauka henidia. Una na ba haeroa, lalomui bae hesiku na garina, laumamui bae manori na

garina. ⁴Umui na kara dika ilao-ahuna o goada-laiamu; to do asio laoa
ahu ela bona raramui e hebulu. ⁵Hahealo herevadia vada o lalo boio
a, tamana ese natuna e sisiba henidiamu na heto e sisiba henimiuimu, e
tomu,

Natugu e, Lohiabada ena mata hakani basio dadaraia

E sisiba hemimumu negadia ai danu lalomu basine manoka.

⁶Badina be Lohiabada ese e ura heniamu tauna matana e hakanimu,
Bona natuna ai e halaodiamu taudia iboudiai e dadabadiam.

⁷Benaini, mata hakani ai ba haheauka; Dirava ese e karamui natu-
adora heğereğeredia. Badina be edena mero na tamana ese matana
se hakaniamu? ⁸Natu iboudiai matadia e hakanimu: bema oi na lasi,
oi na ariara merona, dia natu-adora. ⁹Ina danu: tamada ina tanobada
ai ese matada e hakanimu, bena ta matauraidiamu; matona, laumada
Tamadia na basita matauraia a, bena baita mauri? ¹⁰Badina be idia ese
dina dia hoho ai matadia e hakaniva, edia ura heğereğerena; a ia ese
matada e hakanimu ita ihanamoda, ia ida baita heläga hebou helaoreana.
¹¹Ina harihari mata hakani na asi ena moale bona mai ena hisihisi; a
gabeamo vada e hamanadadia taudia ediai huahuana do baine dobi, kara
maoromaoro ena maino.

¹²Taunabunai, imamui eme heveri ba toi roro, bona aemui eme
pada ba hahedai. ¹³Aemui edia dala maoromaorodia ba kara, bena
ae-hedairike na basine heride, a baine namo. ¹⁴Maino ba ġavaia,
taunimanima iboudiai ida; kara heläga danu, badina be basine abia
tauna na Lohiabada basine itaia. ¹⁵Nahuamui ba toho, ta ese Dirava ena
harihari-bada baine reaia na garina; eiava ramu iditana ta baine kobo na
garina, bena baine haturiamui, bona hutuma baine hadikadia; ¹⁶eiava
bogaragimui ai tau ta baine heuda hanai na garina; eiava Dirava basine
matauraia, Esau heğereğerena, ia ese Dirava se matauraia a ena roboa
ahuna na nau tamona e hoilaia. ¹⁷Badina be umui na dibamui, ia na
gabeai hahenamo iabina e urava, to vada e dadaraia; ena be mai iruru-
matana ida helalo-kerehai dalana e tahua, to se davaria.

¹⁸Umui vada o raka henia kahi gabuna na dia ba dava toho ġauna, dia
lahi hururu-hururuna, dia dibura bona dagadaga bona lahi badana, ¹⁹dia
kibi reğena bona gado. Una gado erena e kamonai taudia e noinoi, basine
hereva henidia lou eto, ²⁰badina be asi edia haheauka una hahedua
bae badinaia, eto, Mauri ġauna ta ororo ai baine kau, nadi ai ba hodoa
mase. ²¹Bona ita-itana na mai garina dainai Mose eto, Name gari, name
heudeheude. ²²A umui vada o raka henia kahi gabuna be Siona ororona,
Mauri Diravana ena hanua, guba Ierusalemana; aneru diaġau duahi-
duahi e hebulu gabuna; ²³hegogo badana, natu roboadria, ladadia guba
ai e hetore taudia edia ekalesia e moale hebulu gabuna, taunimanima
iboudiai edia Hahemaoro Diravana dekenai, kara maoromaoro ai vada e

ḡoeva-dae taudia laumadia dekediai; ²⁴bona Iesu dekenai, ia na taravatu matamatana ena herohemaino tauna; bona vada e nevarilaia rarana enai, ena hahenamo ese Abel rarana ena e hereaiamu.

²⁵Nahuamui ba toho, e hereva henimui mu tauna ba dadaraia na garina. Badina be tanobada ai e sisiba henidia tauna e dadaraia taudia na asi edia roho mauri dalana; benaini, ita na guba amo e sisiba henidamu tauna baita dadaraia, ede baita roho mauri tonma? ²⁶Una negana ai ia gadona ese tanobada e haheude-heudea; a harihari eme gwau hamata, e tomu, Nega gabena ai dia tanobada mo to guba danu baina haheude-heudea. ²⁷Una hereva “nega gabena” anina binai: haine haheude-heude ḡaudia baine abi oho, e kara ḡaudia bunu; a basie heude-heude ḡaudia na do bae mia. ²⁸Taunabunai, se heude-heudemui basaeiana na tame abia dainai, Dirava baita hanamo, bona baita toma henia diho mai hematauraida ida bona mai garida ida, ia ihamoalena. ²⁹Badina be ita eda Dirava na lahi ḡaraka-ḡaraka.

Hahealo herevadia

13 ¹Heura-heheni na bogaragimui ai baine hesiri. ²Idau taudia iabi-daedia basio lalo boio; badina be una kara dainai haida ese aneru vada e abidia dae, a asi dibadia unu be aneru. ³Dibura rumadia ai e hekoumu taudia ba lalodia, umui danu idia idla bema koumui hebou na heto. E hahisidiamu taudia danu ba lalodia, badina be umui danu mai tau-animui. ⁴Taunimanima iboudiai es headava bae matauraia, mahuta gedana basie hadikaia; badina be Dirava ese herahe-dadi taudia bona heudahanai taudia do baine hahemaoro henidia. ⁵Lalomui ai moni basio hekisehekise henia, a dekemui ai mimia ḡaudia na bavabi, asi karikarimui; badina be Dirava eto, Lau na basina negemu bona basina rakatanimu, lasi ona lasi vaitani. ⁶Taunabunai, mai goadada ida baitato,

Lohiabada be egu hekahā,

Lau na hasina gari;

Taunimanima ese ede bae hadikagu toma?

⁷Ihakaumui taudia, Dirava ena hereva vada e hadibalaimui taudia, na ba lalodia; edia kara anina ba haeroa, bena edia abidadama ba haḡoia. ⁸Iesu Keriso na varani bona harihari dia idau, bona basine idau ela bona hanaihanai. ⁹Hahediba herevadia idau-idau basie hakaumui kerere; badina be ina na namo, Dirava ena harihari-bada ese laloda baine ba-auka, dia aniani ḡaudia ese; unu ḡau ese e badinava taudia asie hanamodiava. ¹⁰Ita na mai eda pata helāgāna, a ḡuriḡuri kalagana ena hahelaḡā taudia na unu amo basie aniani diba. ¹¹Badina be mauri ḡaudia raradia na hahelaḡā tauna badana ese Helaḡā Herea gabuna ai e vareailaia, kara dika iabi-ohodia, a tau-anidia na taruha murimurinai e ḡole oho. ¹²Unuhetomana Iesu danu ikoukou murimurinai e mase,

ia sibona rarana amo bese taudia baine hahelağadia helaoreana.

¹³Taunabunai, ita na ia dekena baitala, taruha murimurinai, ia hemaraina danu baita huaia. ¹⁴Badina be iniseni ai ita na asi eda mia-hanaihanai hanuana, a mia-hanaihanai hanuana, gabeai baine hedinarai ġauna, ta tahuamu. ¹⁵Taunabunai, ia dainai daba daba idoidiae Dirava iheatolaina na eda boubou ġauna ai baita haloa; ududa bibinadie ese ia ladana bae imodaia. ¹⁶Kara namo bona kohu iharina na basio rea, badina be Dirava ese helağia karadia enehetomadie e moalelaimu.

¹⁷Ihakaumui taudia ba kamonai henidia bona ba matauraidia. Badina be idia ese umui laumamui e gimadiamu, edia kara anidia bae gwaurai hedinarai taudia na heheto. Unu bae kara toma mai moaledia ida baine namo; a mai ġanaġanana ida bae karaia negana ai na emui ai anina taina basine vara.

¹⁸Ba ġuriġuri ai emai; badina be ai a tomamu lalomai be ġogoeva-ġogoeva, bona a uramu ġau idoidiae baia kara maoromaoro. ¹⁹Lau na noinoi henimuimu, unu ba kara toma, bena ma baina vasi haraġa-haraġa.

²⁰Maino Diravana, mamoe ireġudia tauna badana, Iesu Keriso, miahnaihanai herohemainona rarana dainai mase amo e hatorea isi lou Diravana, ese ²¹ħau namodia idoidiae baine hanamolaimui ġugħuru; bena umui ese iena ura ba kara, bona ia ese e moalelaimu ġaudia na umui lalomui ai baine havara, Iesu Keriso dainai. Ia baita imodaia hanaihanai. Amen.

²²Varavaragu e, lau na noimuimu, egħi hahealo herevadie bavibidae, badina be hereva dia hoho vada name tore henimui. ²³Ba diba, varavarada Timoteo vada e ruhaia nege. Ia bema mai haraġa, raruosi baiama vasi itamui. ²⁴Ihakaumui taudia iboudiai bona helağia taudia iboudiai ba hanamodia. Italia taudia ese e hanamomuimu. ²⁵Harihari-bada be iboumu ai emui ai baine mia. Amen.